

Hset Hêbru

Jesus yeo haqnêq ka bình plinh

1

¹ Calah nêh , Boc Plinh khoe yôc bài pajàu ðòeq hu hnài bài boc yaq bèn bàc yàng bàc trong .² khoe aih trùh ta bài hi atiq kô , haq hnài bèn xi kon cla haq , aih Kon , haq ma khoe dèch paqnàng hujah ðồng rìm yiniq , èh hadai ajang Kon aih raq haq ma khoe broq loh Plinh crông taneh .³ Kon aih la kan qngah qngai da Boc Plinh , aih raq radua qmù da haq , yôc bàu i cwìang itai haq ðòeq dèch paqnhrang rìm yiniq , jò Kon khoe broq hreo ðồng yiniq lui , jah haqngui enh qma Boc Plinh , oe tanòe ðiq jah haqnêq ,⁴ qmang aih yiniq haq jah yi haqnêq ðồng ka yiniq bình plinh ðàng leq aih èh haq jah yeo haqnêq ðồng ka wì ðàng aih ðiq .

⁵ Majah qmang aih Boc Plinh alah doe ka bình plinh leq rameh :

“Ìh kô kon au ,

Hì kô au khoe ha-*uang* qnoh ìh ?

Alah i jò leq Haq doe :

“ Kô èh au broq baq ìh ,

Ìh broq kon au ” ?

⁶ Mahaq jò Boc Plinh qmùt dèh Kon ramua ta crông taneh , aih haq doe rameh :

“ ðiq ðồng bình plinh da Boc Plinh ep kùh waiq Kon ”.

⁷ Ràu trùh bình plinh haq doe :

“ Boc Plinh broq ka bình plinh da haq tìah ka cayeo ,

Broq ka hapõng da haq tìah ka pla ùnh ”.

⁸ Mahaq anoe trùh deh Kon , haq doe :

“ Boc Plinh ôi , gèq bùa da Ìh oe yôt enh qnhòng kô trùh qnhòng tau ,

Cwìang diac da Ìh aih cwìang da kan taq atoq .

⁹ Ìh enh trong taq atoq , git trong dù ,

Aih iq , Chuaq ôi , Boc Plinh da Ìh yôc ðàu lem bùi xùt ka Ìh .

Broq ka Ìh yeo qnhèq ðồng ka bua Ìh .

¹⁰ Boc Plinh doe hòm :

“ Chuaq ôi , adroe ðiq ðồng Ìh khoe broq xèm taneh .

Trôc hadai loh enh tì kông Ìh .

¹¹ Plinh crông taneh èh raliang lùch , mahaq Ìh oe yôt

Plinh crông taneh èh kùn tìah ka ahyah eo .

¹² Ìh canua haq bu ðàng blah eo yôh

Khoe aih plinh crông taneh hi tablòq

Mahaq Ìh dua mòeq jaq .

Bài hanam da Ìh ùh lùch .

¹³ Boc Plinh alah doe ka bình plinh leq rameh :

“ Haqngui enh qma ka au ,

Trùh jò au roh bài mangai ma tagit broq radua enh qneq ka jènh ìh ?

¹⁴ ðiq ka bình plinh aih ma ùh xài bài yiang patih ka Boc Plinh , khoe jah thê loh ta crông taneh ðòeq patih ka bài mangai ma padon jah kan dèch qmòh ?

2

¹ Qmang aih , kiang bèn ep wèq ka cajap trong bèn khoe jah tàng , dôq ùh hiaq hùu đac taqnoeq .² majah qmang aih , tàng joq bàu da bình plinh anoe aih khoe cajap cajinh , cabô ùh iu ùh tiaq bàu aih khoe jah hnoq kan patem qmòe amat , ³ tàng bèn toq patrò kan dèch kàn kaiq qmang aih , broq qmang leq bèn ma claih ? - kan dèch kô Chuaq anoe qnoh adroe , i mangai ma tàng , anoe panhìn hlài ka nhèn , ⁴ Boc Plinh hadai yôc bəc trong bəc kan halac , yôc kan tabàih dech enh Yiang Hadròeh axong tiaq manoh cla haq enh , ðòeq hu panhìn ka wì aih .

Jesus broq raðeh wìa kon mangai

⁵ Qmang aih , crông taneh ma padon trùh nhèn ma qnang anoe kô , Boc Plinh ùh ðòeq haq oe enh qneq ka cwìang bình plinh . ⁶ Mahaq i ngai khoe doe rameh:

“ Kon mangai kô iq cleq , Chuaq ma hmàng trùh ?

Kon mangai kô iq cabô , Chuaq ma palàng ?

⁷ Chuaq khoe ðòeq haq yì qneq ka bình plinh toq bìa ,

Pa kui am ka haq kui cadoh plinh ranhòm lem

⁸ Chuaq roh ðòeq rìm yiniq enh qneq ka jènh haq”.

Boc Plinh broq ka rìm yiniq ðìq ep oe enh qneq ka Chuaq Jesus , qmang aih dôq ùh i mòeq cleq ùh iu haq , yàng manòeq kô bèn qnhòq hnoq rìm yiniq ðìq iu haq . ⁹ Mahaq Chuaq Jesus kô , ma khoe oe qneq ka bình plinh toq bìa , bèn hnoq haq manòeq kô khoe jah pacui cadoh diac plinh lem ranhòm , pàng haq khoe chiùq cachit . Qmang aih , taiq kan tabàih da Boc plinh , Chuaq Jesus majah khoe cachit am rìm ngai . ¹⁰ Joq Boc plinh la mangai ma rìm yiniq ngeà ðìq ta haq rai canòm ka haq , pàng enh aràng bəc ngai kon trùh ta kan qngah qngai , aih haq broq joq khoe troq jò haq broq ka Chuaq Jesus aih xem kan dèch da wì kon aih ,jah gèh geo ajang kan chiùq xalep . ¹¹ Qmang aih , Mangai ma broq ka hadròeh xam mangai jah hadròeh , aih ðìq loh enh mòeq Baq raq . Aih iq , Chuaq Jesus majah ùh camaih ka creò ka wì aih oh daq . ¹² jò Haq doe

“ Au jah anoe yiniq ìh ka oh daq au ,

Oe taqne Tagop au calêu manè ìh”

¹³ Haq doe hòm “ Au hataq raðeh ka Chuaq .

Èh hòm :

“ Kô au xam bài kon Boc Plinh ma khoe am ka au”

¹⁴ Qmang aih , taiq wì kon i xech i mahim dài cla Chuaq Jesus majah hadai waq ka i qmang aih ðìq , ðòeq jò cachit , haq jah raliang đac mangai ma wèq cwìang kan cachit aih Satan . ¹⁵ rai paclaih am ka rìm ngai taiq crè ka kan cachit dài majah ep broq ðeh hapông lùch ka qnhòng . ¹⁶ Joq qnàng , haq trùh ùh xài ðòeq hu wiang ka bài bình plinh , mahaq ðòeq hu wiang ka nang noe da Apraham , ¹⁷ Aih iq , dài rìm trong haq majah ep broq tiah dèh ka oh daq , ðòeq enh ngeà Boc Plinh jah wìa Pajàu haqnhèq, loq ha-och , ùh tablòq manoh , ðòeq cachit ka yiniq lui da kon mangai . ¹⁸ Pàng cla haq khoe chiùq nanxa ta kan padô qnùt, dài haq majah i cwìang dèch bài mangai jò wì glàm kan padô qnùt .

3

Jesus yeo haqnhèq ka Moise .

¹ Qmang aih , ôi oh daq hadròeh , aih bài mangai hadai jah bàu creò enh plinh , drah hèm trùh Mangai wê bàu , Mangai pajàu haqnhèq bèn ma khoe lùì tiaq, aih Chuaq Jesus . ² Haq ùh tablòq manoh dèh ka Mangai ma thê haq , tiah ka Môise ùh tablòq manoh ka hnim Chuaq . ³ Majah qmang aih , Chuaq Jesus khoe jah ranhòm jah haqnhèq ùh hnau ka Môise ,tiah ka mangai broq hnim ranhòm ùh hnau ka chac hnim . ⁴ Majah qmang aih , rìm toq hnim ðìq i mangai broq loh ; mahaq Mangai ma broq loh rìm yiniq aih Boc Plinh . ⁵ Môise , haq ùh tablòq manoh ta hnim Chuaq tiah ka mangai hapông khoe jah creò ðòeq hu panhìn ka bài bàu Boc Plinh ma anoe ta hi

atiq kô èh . ⁶ Mahaq Christ aih ùh tablòq manoh qmang ka cla kon calô wèq cwàng ta hnim Boc plinh ; yàng aih bèn kô raq hnim Boc plinh , waq toq bèn cajap manoh lùì xam kan canòm trùh lùch , yôc biac aih raq broq deh kan ranhòm ka bèn .

⁷ Aih iq , qmang ka Yiang Hadròeh i doe

“ Hì kô tàng pì tàng bàu haq ,

⁸ aih apaq cadoq manoh qmang ka pì khoe broq jò àu yòng tablêq ka haq.

Aih hì pì ma qnhro Boc Plinh tanoè braih kàn .

⁹ Aih nòe boc yaq pì khoe hnoq yiniq au broq ta pôn jàt hanam .

Mahaq dua oe raq enh ti qnhro ngan au !

¹⁰ Qmang aih , Au majah nòeh ka nang noe aih ,

Au doe : Manoh da wì haq toq lam liq ,

Qnhòq lah qnì ka trong da au .

¹¹ Kô bàu au hapah ta kan panòeh : wì haq blinh ùh jah mùt ta kan padài da au” .

¹² Oh daq rabiaq oq , òeq qne oh daq ùh hìaq mangai leq i manoh dù rai ùh lùì , loh qmòe ka cađac Boc Plinh halinh qmòh . ¹³ Mahaq rìm hì ep ti pariaq dabau, jò ma oe raq jah creò “Hì kô”

òeq òeq òeq oh daq ùh hìaq i mangai leq cađac yiniq lui padô rađeh loh ka cadoq manoh . ¹⁴

Majah qmang aih , bèn khoe wiang jah pajùm ti Christ , waq toq bèn wèq deh manoh lùì enh jò baxèm cajap trùh lùch , ¹⁵ jò oe raq doe :

“Hì kô tàng pì tàng bàu haq ,

apaq cadoq manoh ,

qmang ka pì khoe broq ,

jò àu yòng talêq ka haq” .

¹⁶ Qmang aih , cabô tàng bàu haq khoe èh hì àu yòng tablêq hlài , aih ma ùh xài bài mangai ma canòm ka Môise qnung wì haq loh enh gùng Êjip qmòh ? ¹⁷ Boc Plinh khoe panòeh ka cabô ta pôn jàt hanam aih ? Ajoq nòeh ka bài mangai ma broq yiniq lui , hanang wì haq ma khoe tacro ta nòe braih kàn qmòh ? ¹⁸ Haq hapah ka cabô jò ma doe : Blinh wì ùh jah mùt tanòe padài da haq ? Ajoq ka bài mangai ma ùh iu bàu ? ¹⁹ Qmang aih , bèn hnoq dài wì aih ma ùh jah mùt , aih taiq wì haq ùh lùì .

4

Kan padài da Boc Plinh têu am ka mangai lùì

¹ Qmang aih , qnang jò oe raq i bàu têu am jah mùt ta kan padài da Chuaq , bèn drah loq crè , tabeq loq i mangai leq taqne oh daq loq ùh jah mùt qmòh . ² Majah qmang aih Bàu lem kô khoe jah anoe am ka bèn hadai tiah qmang ka wì aih ; bài bàu wì haq ma khoe tàng aih ùh i lòeq cleq, majah qmang aih jò tamàng , wì ùh yôc manoh lùì òeq hujah bàu aih ka rađeh . ³ Yàng da bèn aih bài mangai ma khoe lùì , aih jah mùt ta kan padài , wop qmang ka Boc Plinh khoe doe

“ Kô bàu au hapah ta kan panòeh ,

Wì haq blinh ùh jah mùt ta kan padài da au” .

Hnoq anoe qmang aih , biac broq da haq khoe gèh qmòe enh jò baxèm broq plinh crống taneh . ⁴ Majah qmang aih , anoe trùh hì ma tapèh , i bàu achìh rameh :

“Hì tapèh Boc Plinh padài òeq ka yiniq broq” .

⁵ Ajang qnoeq hòem ,achìh rameh :

“ Wì haq blinh ùh jah mùt ta kan padài da au” .

⁶ Qmang aih , khoe palauq òeq ka qnah ngai jah mùt ta kan padài aih , mahaq bài mangai ma khoe tàng Bàu lem aih angoe nêh khoe ùh jah mùt taiq wì haq ùh iu , ⁷ khoe aih dùnh haraya , ta bàu calêu da Đawit , Chuaq i pajaq ònh mòeq hì qnoeq hòem hadai creò “ Hì kô ” tiah ka bàu ma taboe enh ngoe iq :

“ Hì kô tàng pì tàng bàu haq ,
apaq cadoq manoh” .

⁸ Tàng joq Jôsuê khoe am wì kan padài , atiq ka aih Boc Plinh ma oe ràu trùh mòeq hì ma qnoeq hòim . ⁹ Qmang aih oe i mòeq hì padài ka mangai da Boc Plinh . ¹⁰ Majah qmang aih cabô mùt ta kan padài da Boc Plinh , mangai aih jah padài dèh ka yiniq broq , qmang ka Boc Plinh padài deh ka yiniq broq . ¹¹ Qmang aih , bèn ep àu diq ka padren òòeq jah mùt ta kan padài aih , òòq ùh hìaq i cabô taqne bèn cro tiaq dua bài mangai ma ùh iu tau. ¹² Majah qmang aih bàu da Boc Plinh aih bàu rih , bàu xit , hin ùh hnau ka chang baiq mán , pác jrùq ta bèn ,loh qmòe ka jah ralah mahua , yiang , atap, tangau , chèh ngan ta gàu ngóc xam yiniq khoe qnac ta manoh cliac . ¹³ Ùh i cleq jah cadoc hlèp enh ngèa ka Boc plinh , diq òòng ep paqnoh ralênh enh ngèa haq ,aih Mangai bèn ma ep taqmon hlài rìm yiniq bèn ma khoe broq . ¹⁴ Qmang aih , pàng bèn i mòeq ngai Pajàu haqnèq khoe tóc ta plinh , aih la Chuaq Jesus Christ kon da Boc Plinh , dài bèn majah ep wèq ka cajap trong bèn ma khoe lùt tiaq. ¹⁵ Majah qmang aih , bèn ùh i ka pajàu haqnèq ma ùh dùh qmòe ka ha-och kan ùh nèn da bèn , mahaq bèn i mangai Pajàu khoe chiùq qnhro ta rìm yiniq qmang ka bèn , mahaq ùh jò leq broq yiniq lui . ¹⁶ Qmang aih bèn drah cajap manoh thia haten rangàu xôq ramot , òòeq hujah kan tamèt rai chaq jah kan tabàih dech òòeq hu wiang ti bèn jò bèn ma i yiniq nhet òòeq ka waq .

5

¹ Rìm ngai pajàu haqnèq , ma khoe jah ràih enh kon mangai , wì dèch haq aih òòeq broq mangai patih am ka wì enh ngèa ka Boc Plinh , òòeq dèch ngè tadreo xam ramèn cachit am ka yiniq lui .

² Haq aih hadai ùh nèn rìm trong , dài haq majah loq ha-och ka mangai ma lam hwang ùh qnì òòeq cleq . ³ Taiq kan ùh nèn aih dài haq majah ep dèch ngè tadreo ka ràdeh , hloe xam yiniq lui da mangai qnoeq . ⁴ Èh hòim , ùh i mangai leq jah blah yóc kan ranhòm aih ka ràdeh ; mahaq waq ka jah Boc Plinh creò tiaq ka Arôn nèn . ⁵ Hadai qmang aih , Christ ùh padèch òòeq broq Pajàu haqnèq ; Mahaq Boc Plinh khoe doe ka haq

“ Ìh kô Kon au,

Au khoe ha-uang ìh hì kô” .

⁶ Ajang qnoeq hòim i doe ka haq rameh:

“ Ìh broq pajàu mòeq òòeq ,

Tiaq apah da Menchixêdec” . ⁷ Jò Chuaq Jesus Christ oe raq rih ta crông taneh , haq khoe dèh bàu crò hmoe òòeq dèch bàu waiq khàn àu bòch Mangai ma i cwiang dèch haq jah claih ka cachit , bàu haq khoe jah tamàng . ⁸ Majah qmang aih , yac ka haq aih Kon , mahaq khoe hóc yóc kan loq iu enh bài kan xalep òòeq ma glàm , ⁹ jò khoe jah gèh geo , hì wia rangàu da kan dèch claih mòeq òòeq ka mangai iu bàu haq , ¹⁰ èh i Boc Plinh doe haq broq Pajàu haqnèq tiaq apah da Menchi-xêdec . ¹¹ Anoe trùh trong aih , bèn i bàc yiniq hu anoe , mahaq ùh hlàu cleq ka anoe òòeq oh daq jah loq ka hloh , majah qmang aih oh daq khoe loh ka pi dai qnì tàng . ¹² Majoq aih oh daq broq mangai hnài khoe dùnh , yàng manòeq kô aih oe raq waq ka i mangai yóc bài yiniq bu hwang hwòt enh baxèm da bàu Boc Plinh hu hnài oh daq , oh daq oe raq ôq diac tôh , qnhòq hlàt acaq dahwèq cadoq . ¹³ Qmang aih , mangai leq rih canòm toq ka diac tôh , haq ùh qnì ka trong taq atoq , majah qmang aih haq oe raq kon hin . ¹⁴ Mahaq dahwèq acaq ma gang cadoq aih òòeq ka mangai dang kàn , am ka mangai loq i manoh àu axrà òòeq canau ka trong lem xam trong dù .

6

¹ Qmang aih , bèn ep clech enh tau ka bài bàu hnài baxèm Bàu lem da Chirst, òòeq trùh ta kan gèh geo , pi dùh tàc hlài xàn hnim hòim , aih iq rameh : cađac bài biac cachit , lùt Boc Plinh . ² trong hnài ramèn baptem , trong roh tì ta chac wì , trong mangai cachit rih hlài , trong hadrah

mòeq òe .³ Tàng joq Boc Plinh lòh , aih èh bèn hi broq bài trong aih .⁴ Majah qmang aih , bài mangai ma khoe jah sreo qngah mòeq yàng , khoe hmaq loq kan am dech enh plinh , hadai khoe wiang jah Yiang Hadròeh ,⁵ loq kan nhim da bàu Boc Plinh xam kan itai ta qnhòng atiq .⁶ Tàng oe tacro , aih pi oe jah broq ka wì haq raxach hlài hòim , majah qmang aih wì haq khoe tiang đình Kon Boc Plinh talong pagat ka rađeh mòeq yàng hòim , rai baxep haq dōq mangai hnoq đeh hra .⁷ Majah qmang aih, taneh i diac mè yôt men loh long loh nhat , i lòeq ka mangai ma abèq , taneh aih jah xōq ramot enh Boc Plinh .⁸ Mahaq taneh leq ma hon toq yila , toq cađê , taneh aih èh wì cađac , jah toq bàu ra-òh hamaiq , pulùch èh ep bùh đac .⁹ Hnoq nhèn doe qmang aih , yôiq wì oh daq da au , dua nhèn oe tangèh gòm yiniq ma yeo lem ta pì, aih bài yiniq aràng pì trùh ta kan jah dèch .¹⁰ Boc Plinh ma i ùh taq atōq , haq ùh hêt yiniq broq xam manoh loq waq da oh daq khoe paqnoh ka yiniq haq jò oh daq patih am ka mangai da haq , trùh manòeq kô dua pì oe raq patih .¹¹ Mahaq nhèn ngèh rìm ngai tapì òiq i manoh loq nhet qmang aih òeq kan tangèh da oh daq jah broq gèh trùh lùch .¹² Qmang aih oh daq ùh hìaq loh ka ra-òeq , mahaq top dua bài mangai i manoh lùl xam kan loq kềm men khoe jah waq kùng hang tiaq bàu Chuaq ma khoe têu am .¹³ Jò Boc Plinh têu bàu ka Apraham , pàng pì i qmòe cabô ma yeo haqnhèq loe , dài haq majah patô cla rađeh òeq hapah ka Apraham .¹⁴ Haq doe rameh : Kô èh Au am ka ìh xōq ramot bàc joq qnàng rai broq ka xinoe ìh jah ha-uang tam ka bàc .¹⁵ Qmang aih , Apraham chiùq àt chiùq gòm , aih men jah bàu ma khoe têu am ka rađeh .¹⁶ Kon mangai wì yōc yiniq mangai ma yeo kàn ka rađeh òeq hu hapah , tàng loq i yiniq tarahen , wì yōc bàu hapah aih òeq hu panhìn ka cajap .¹⁷ Boc Plinh hadai qmang aih , enh broq ka bài mangai majah waq bàu haq ma têu am loq ka haq ùh tablòq manoh , dài aih haq majah yōc bàu hapah .¹⁸ òeq canòm ka baiq yiniq ma ùh jò leq tablòq aih , baiq yiniq aih Boc Plinh òiq ùh capoch qnùt , - bèn chaq jah kan alòng kàn , bèn aih mangai khoe cađau tùh tanòe hanhàng , jah cadop yōc kan tangèh ma khoe òeq enh ngèa bèn .¹⁹ Bèn wèq kan tangèh aih tiah ka long tanáp da mahua yiang , cajap cajinh mùt trùh enh tau ka bai prinh ,²⁰ aih nòe hadròeh , Chuaq Jesus tiah ka Mangai pèh trong khoe lam adroe ka bèn , majah qmang aih haq khoe broq Pajàu haqnhèq mòeq òe tiaq apah da Mênchixêdec.

7

Mênchixêdec....

¹ Mênchixêdec aih bùa da Salem , pajàu kàn da Boc Plinh ma òiq jaq haqnhèq , khoe loh òih Apraham rai waiq am xōq ramot jò haq tawih hlài enh nòe haq tajêh khoe blêq bài bùa ,² Apraham yōc mòeq ta mòeq jàt phàn kùng hang rađeh òeq dèch ka bùa . Mênchixêdec ngiah ma adroe aih la : bùa da kan taq atōq , ngiah atiq ka aih hòim bùa da Salem aih bùa da kan catèm .³ haq ùh i ka baq ka miq , ùh i ka nang noe , ùh i ka hì baxèm ha-uang , ùh i ka hì cachit , qmang ka Kon Boc Plinh broq pajàu mòeq òe .⁴ Hèm beq , jaq cla Apraham aih kan cadraq bèn khoe yōc mòeq ta mòeq jàt phàn ma òiq jaq lem tabài dahwèq haq khoe jah blah yōc òeq dèch ka bùa , aih bùa aih haq haqnhèq dàng leq .⁵ Tiaq ranenh bài xinoe Lêwi ma broq pajàu , i cwiang tigop yōc mòeq ta mòeq jàt phàn enh mangai jàn , aih la enh hadròng cla majah qmang aih cla wì haq hadai loh enh Apraham .⁶ Yac ka Mênchixêdec ùh xài xinoe da Lêwi , mahaq haq jah yōc mòeq ta mòeq jàt phàn da Apraham rai waiq xōq ramot ka mangai ma jah waq bàu têu am da Boc Plinh .⁷ Manòeq kô mangai ma yeo haqnhèq waiq xōq ramot ka mangai ma yeo haqneq , trong aih pi ep rahen dèh .⁸ Loq ka ajang kô , bài mangai ma tigop yōc mòeq ta mòeq jàt aih òiq bài mangai loq cachit : yàng ajang tau hòim , aih mangai ma i bàu panhìn doe haq qnang rìh .⁹ Qmang aih bèn jah doe qmang kô : Lêwi aih mangai tigop yōc mòeq ta mòeq jàt phàn , cla haq hadai khoe dèch mòeq phàn mòeq jàt tiaq ajang Apraham .¹⁰ majah qmang aih , jò Mênchixêdec loh òih Apraham , jò aih Lêwi oe raq ta chac Apraham .

¹¹ Tàng ma loq jah kan lem geo canòm ka mangai Lêwi broq pajàu (majah qmang aih Ranenh khoe jah am ka kon mangai jò wì haq oe raq enh qneq ka cwiàng da pajàu), aih hagleq ma oe waq ka padèch ònh mòeq ngai pajàu qnoeq , tiaq apah da Mênchixêdec , ùh tiaq xinoe da Arôn ?

¹² Qmang aih, khoe halih pajàu aih èh ranenh hadai ep waq ka halih diq . ¹³ Mangai bài bàu aih ma anoe trùh , oe ta xinoe qnoeq , xinoe aih qnhòq hmaq i cabô patih nòe prang tadreo . ¹⁴ Majah qmang aih , Chuaq da bèn loh enh xinoe Jiudá , xinoe aih Môise ùh i ràu trùh trong broq pajàu .

¹⁵ Trong aih yeo ro hòm , jò bèn hnoq i mòeq ngai pajàu qnoeq jah dèch paqnàng , tiaq ka Mênchixêdec , ¹⁶ dèch paqnàng ùh tiaq ranenh da kon mangai , mahaq tiaq cwiàng itai da kan rih halinh ùh jò leq hnhung lùch . ¹⁷ Hacô bàu panhìn ka haq

“ Kon broq pajàu mòeq òe .

Tiaq apah da Mênchixêdec” .

¹⁸ Qmang aih , ranenh ma adroe nèn ùh i ka cwiàng ùh i ka lòeq cleq dài majah khoe cađac . ¹⁹ majah qmang aih , ranenh ùh broq gêh qmòe cleq , èh hòm i mòeq kan canòm qnoeq , ma yeo lem aràng am ka bèn , kan canòm kô ma broq ka bèn jah haten ka Boc Plinh . ²⁰ Yeo hnau ka aih hòm i bàu hapah , wì ma qnoeq broq pajàu ùh i ka bàu hapah . ²¹ yàng haq khoe jah dèch paqnàng xi bàu hapah , jò Boc Plinh doe ka haq

“ Chuaq khoe hapah , èh pì jò leq haq tablòq manoh ,

Kon broq pajàu mòeq òe” .

²² Qmang aih , Chuaq Jesus khoe wìa Mangai broq ka cajap bàu tajao maneo lem yeo hnau ka ma dùnh . ²³ Èh hòm , bài mangai broq pajàu aih bác , mahaq kan cachit khech tát dài wì haq ma ùh jah broq hloe . ²⁴ Yàng Chuaq Jesus aih halinh yôt , dài haq jah broq pajàu mòeq òe . ²⁵ Qmang aih , haq majah i cwiàng dèch diq đống bài mangai canòm ka haq òeq hu thia ten ka Boc Plinh , majah qmang aih haq rih halinh òeq waiq khàn am ka wì aih . ²⁶ Aih ma joq pajàu haqnèq ma troq ka bèn, hadròeh , ùh i ka yiniq lui ,hliang lem , lah ðeh crài ka mangai i tuiq , jah dèch atóc yeo haqnèq ka tróc . ²⁷ ùh tiaq ka bài pajàu haqnèq ma qnoeq , ep dèch ramènh tadreo rìm hì , angoe aih ka yiniq lui da cla , atiq aih ka yiniq lui mangai qnoeq ; Haq dèch ramènh mòeq yàng raq khoe gêh geo hloe , dèch chac cla haq broq ramènh tadreo . ²⁸ Majah qmang aih , ranenh yóc bài mangai ma ùh nèn ðeh dùnh broq pajàu haqnèq ; mahaq bàu hapah ma i atiq ka hset ranenh aih ði cla Kon , aih Mangai ma gêh geo mòeq òe .

8

Pajàu haqnèq da tajao neo

¹ Bài yiniq nhèn maneo anoe kô , ma palênh aih rameh : Bèn i mòeq ngai Pajàu haqnèq , haqngui enh qma gèq Bùa Haqnèq ta diac plinh , ² qnang broq Mangai patih tanòe hadròeh xam ta hnim ranòh joq qnàng , broq loh enh tì kông Chuaq ùh xài loh enh tì kông kon mangai . ³ Rìm ngai ma khoe jah dèch tót broq pajàu haqnèq aih òeq dèch ramènh xam ngè tadreo , qmang aih haq kô ep dèch ramènh cleq . ⁴ Tàng haq oe raq ta crông taneh , aih haq ùh xài pajàu haqnèq , majah qmang aih ta crông taneh i bác ngai pajàu dèch ramènh tadreo tiaq bàu ranenh thê , ⁵ wì patih ta hnim kùh waiq , mahaq hnim kùh waiq aih broq dua qmù da bài yiniq oe ta plinh , tiaq ka jò Môise padon broq hnim ranòh , Boc Plinh i pariaq haq : “ Rabiaq oq , broq rìm yiniq troq tiaq dua au khoe patô ka ìh ta bui wang” . ⁶ Yàng manòeq kô , yiniq broq da Chuaq Jesus khoe yeo haqnèq ka da wì qnoeq , majah qmang aih haq aih mangai taqne da tajao ma yeo lem , tajao aih loh enh bàu têu am ma yeo lem . ⁷ Majah qmang aih , tàng joq tajao ma adroe ùh hiaq thiùq qmòe cleq , aih ma i ka nòe hu broq tajao ma atiq . ⁸ Mahaq Boc Plinh cwò ka mangai Jiudá , haq doe :

“Chuaq doe , tabài hì ma padon trùh kô èh ,

Aih jò au pagêh tajao maneo ka hnim Isorali xam hnim Jiudá .

⁹ Ûh tiah ka tajao au ma broq ti bõc yaq wì haq ,
Aih hi au ma cadop kõng wì haq , ajèn wì loh enh diac Êdip,
Pàng wì haq ùh cajap manoh wèq tajao da au ,
Dài au majah ùh blèch ngan wì , aih bàu Chuaq doe” .

¹⁰ Chuaq doe hòim

“ Kô bàu tajao au am ka hnim Isorali ,
Atiq ka hi aih ,
Au òòeq ranenh da au ta gàu wì .
Achih qmùt ta cliac wì haq ,
Au broq Boc Plinh wì ,
Wì haq jah broq mangai da au .

¹¹ Taqne wì haq , pi i ka cabô oe ep hnài dèh mangai haten hatia ,
Xam oh daq da cla rameh : Drah canau loq ka Chuaq ;
Majah qmang aih òiq dõng ka wì haq ;
Enh mangai ma òiq jaq hamoq trùh mangai ma òiq jaq kàn òiq jah loq ka au ,

¹² Majah qmang aih , au caqnaih dõng kan dù wì haq ,
Pi hmàng trùh yiniq lui wì haq hòim” .

¹³ Creo ka ma kô aih “ tajao maneo” , qmang aih haq khoe broq ka tajao ma adroe khoe wìa ma dùnh , qmang aih yiniq cleq ma khoe dùnh , khoe tagôì , aih èh hi padon hnhung lùch ðeh .

9.....

¹ Tajao adroe nèh hadai i bài ranenh kùh waiq xam moeq nõe hadròeh oe ta crõng taneh .²
Qmang aih , mòi eq toq hnim ranòh kùh waiq khoe jah broq , hagan adroe creo dèh nõe hadròeh , i jènèh ðen , cabõng xam bènèh padon ta aih ,³ khoe aih trùh hagan enh dalam ka bai prìn , aih nõe òiq jaq hadròeh ,⁴ ta aih i prang kùh waiq broq xi wang , xam hom tajao , òiq jah glom xi wang . Ta hom aih i mòi eq toq cabi broq xi wang ta aih tah bình mana , mòi eq toq long dùì da Arôn , baiq capiac hmo tajao ,⁵ enh crõng calàp hom i baiq chérubim qngah qngai hlia panan, qmù haq yàp òiq tanòe baxon yiniq lui . Mahaq kô aih ùh xài jò arèn taqmon ka hloh bài trong aih .⁶ Rìm yiniq khoe jah taqmroq qmang aih , rìm hi bài pajàu mùt ta hagan ma adroe ta hnim kùh waiq òòeq pagèh trong ramènèh kùh waiq ;⁷ mahaq , ta hagan baiq , aih mòi eq hanam mòi eq yàng , mòi eq ngai cla pajàu haqnèhèq raq ma jah mùt , ùh jò leq ma ùh wê mahim hu dèch ramènèh ka yiniq lui cla xam yiniq lui òiq ka mangai .

⁸ Yiang Hadròeh yõc ajang aih òòeq mahnu : waq toq oe raq i hnim ranòh kùh waiq ma adroe, aih èh trong mùt tanòe òiq jaq hadròeh qnhòq jah pèch .⁹ Aih òòeq hu aliah ka bèn qnhòng manòeq , òòeq hu patô bài trong kùh waiq xam ramènèh tadreo aih ùh broq ka manoh mangai kùh waiq jah geo lem .¹⁰ Aih xài bài ranenh da chac hamac . Ta aih toq bài dahwèq acaq xam dahwèq ôq xam bài ranenh qnheo crài ka dabau . Gòm trùh hi broq ònh tajao maneo.¹¹ Mahaq jò Christ khoe trùh broq pajàu haqnèhèq da bài kan lem ma atiq kô ; Haq khoe mùt ta hnim ranòh kùh waiq ma yi kàn ,ma yi geo , ùh xài broq loh enh tì kõng kon mangai , hadai ùh xài taqnòng kô .¹² Haq khoe mùt tanòe òiq jaq hadròeh mòi eq yàng raq khoe lap am ka òiq dõng , ùh wê mahim bubi xam mahim kon bo , mahaq yõc qmòe mahim cla , òòeq hujah baxon hlài yiniq lui mòi eq òòe .¹³ Tàng joq mahim bubi calô , bo calô xam loc bo adrùh wì ma yõc chùi ta chac mangai ma ùh sròeh aih xôq jah broq ka xech akia wì jah hadròeh ,¹⁴ loq ka mahim da Christ , aih Mangai ma canòm ka Yiang Hadròeh halình mòi eq òòe , yõc chac cla raðeh ma ùh i qmòe ka xit ka habau dèch am ka Boc Plinh , qnheo hreo manoh cliac bèn pi hiaq oe patih ka kan cachit hòim , òòeq hujah patih ka Boc Plinh ma rìh halình , aih dàng leq !¹⁵ Ajang aih raq , Haq aih mangai taqne da tajao maneo, dòq jò haq khoe chiuiq cachit haq jah baxon bài yiniq lui ma khoe

broq jò oe enh qneq ka tajao ma dùnh , aih èh mangai ma jah creó jah trùh yòc kùng hang mòeq òe ma khoe têu am ka rađeh .¹⁶ Majah qmang aih jò khoe achih jàiq tanap , aih èh ep gòm mangai ma tanap cachit hòeq ,¹⁷ Jàiq tanap aih i cwiang atiq ka jò mangai tanap cachit , majah qmang aih waq toq mangai tanap oe rih , jàiq aih ùh i cwiang cleq .¹⁸ Qmang aih tajao ma adroe hadai yòc mahim hu broq .¹⁹ Jò Môise khoe anoe òiq òng bài bàu ranenh thê am òiq ka mangai tamàng , haq i yòc mahim kon bô xam mahim bubi calô , pajùm xam òiac , haq yòc caxy capaih gòh xam hamenh cachiq xôn timer da arat ta hset xam òiq òng ka mangai ,²⁰ haq doe : Kô mahim tajao Boc Plinh ma khoe thê pì wèq tiaq .²¹ Khoe aih haq yòc mahim aih da arat ta hn timer ramòh kùh waiq xam rìm yiniq oe ta aih .²² Tiaq ranenh : rìm yiniq òiq canòm ka mahim men jah hadròeh , ùh ta-ùc mahim ùh i kan paclaih yiniq lui .²³ Qmang aih , tàng joq rìm radua qmù òeq patiah ka bài yiniq ma oe ta plinh ep qmang aih men jah basròeh , aih èh chac bài yiniq ma oe ta plinh kiang ma ep canòm ka ramèn timer ma yeo lem men jah hadròeh .²⁴ Majah qmang aih Christ ùh mùt tanòe hadròeh loh enh tì kòng kon mangai ma broq tiaq dua da nòe hadròeh joq qnàng , mahaq mùt qmòe ta plinh , òeq manòeq kô haq yòng am ka bèn enh ngèa Boc Plinh .²⁵ Aih ùh xài haq mùt ta aih òeq òeh rađeh broq ramèn timer tadreo bác yàng tiah ka bài pajàu haqn timer mòeq hanam mòeq yàng mùt tanòe òiq jaq hadròeh òeq hu òeh mahim mahaq ùh xài mahim cla .²⁶ Tàng ùh qmang aih , enh jò baxèm broq plinh cròng taneh trùh manòeq , haq khoe ep xalep bác yàng . Mahaq manòeq kô ta qnhòng ma atiq lùch , haq khoe loh qmòeq yàng raq , yòc cla rađeh broq ramèn timer òeq hu paclaih òng bài yiniq lui .²⁷ Tiah ka ma khoe pajaq , kon mangai ep cachit mòeq yàng , khoe aih ep chiuq kan hadrah .²⁸ hanoh qmang aih , Christ khoe òeh rađeh broq ramèn timer mòeq yàng raq òeq òeh yiniq lui da bác ngai ; Haq hadai trùh hòm yàng baiq , ùh xài òeq òeh yiniq lui hòm , mahaq òeq am kan òeh paclaih ka mangai ma gòm haq .

10

Ramèn timer da Jesus mòeq yàng raq khoe lap

¹ Ranenh aih qmù da biác lem hi atiq , ùh i ka chac joq qnàng , òai ma canòm ka ramèn timer tadreo rìm hanam qmang aih , ùh jò leq broq ka mangai ma tia haten ka Boc Plinh jah lem geo .² Tàng loq jah , aih bài mangai kùh waiq mòeq yàng raq khoe jah hreo manoh cliác wì haq ma oe qnì ka yiniq lui hòm , ajang aih ajoq wì khoe hêq ka òeh ramèn timer tadreo qmòh? .³ Majoq qnàng , bài ramèn timer tadreo rìm hanam aih òeq bahmàng da wì haq yiniq lui .⁴ Majah qmang aih , mahim bô calô xam mahim bubi calô ùh jah lèh caqn timer yiniq lui .⁵ òai qmang aih , jò Christ loh ta cròng taneh kô , haq i doe

“ Boc Plinh ùh enh bài kùng hang xam ramèn timer tadreo .

Mahaq khoe palauq òeq ka au mòeq toq chac .

⁶ Boc Plinh ùh waq ,

Yac ka tadreo bùh , tadreo baxon .

⁷ Khoe aih , au hi doe :

Hacô au khoe trùh , ta hset i achih trùh au –

Au trùh òeq broq tiaq manoh lh ma enh , ôi Boc Plinh da au”.

⁸ Adroe haq khoe doe : “ Boc Plinh ùh enh , ùh waq yac ka tadreo rih , tadreo bùh , tadreo baxon , aih bài yiniq ma ep broq tiaq bàu ranenh thê . Atiq aih haq doe “ Hacô au khoe trùh òeq broq tiaq manoh lh ma enh .⁹ Qmang aih , Chuaq khoe cađac yiniq ma adroe , òi tiaq yiniq ma atiq .

¹⁰ Tiaq manoh haq enh qmang aih , òai bèn majah hadròeh canòm Chuaq Jesus Christ òeh òeh chac broq ramèn timer mòeq yàng raq khoe lap am ka òiq òng .¹¹ Bài pajàu maqn timer rìm hi yòng patih rai òeh hlài mòeq ramèn timer taha tiah , aih ramèn timer ma ùh jò leq jah òeh òac yiniq lui ,¹² yàng da Pajàu kô , taiq òiq òng yiniq lui haq òeh ramèn timer mòeq yàng raq , khoe aih hi haqn timer

mòeq òe enh qma Boc Plinh . ¹³ Pang aih ta atiq , gòm toq trùh hi bài mangai ma tablêq ka haq ep jah roh broq radua enh qneq ka jènh Haq . ¹⁴ canòm ka ramènh tadreo dèch mòeq yàng aih raq , Chuaq broq ka mangai ma lùì haq jah hadròeh gèh geo mòeq òe . ¹⁵ Yiang Hadròeh hadai wiang panhìn ka bèn , majah qmang aih atiq ka bàu doe :

¹⁶ Chuaq doe “ Kô tajao au broq ka wì haq ,
Atiq ka bài hi aih èh ,
Au òe ranenh da au ta cliac wì haq
Achih òe ta gàu wì haq.

¹⁷ Èh doe hòm :

Au pi hmàng trùh yiniq lui ngang dù da wì haq hòm .

¹⁸ Manòeq kô , nòe leq yiniq lui khoe jah caqnaih , aih pi ep dèch ramènh tadreo ka yiniq lui hòm .

¹⁹ Qmang aih , oh daq da au , taiq bèn khoe canòm ka mahim Chuaq Jesus , dài ma pi hòq ka mùt tanòe òi jaq hadròeh , ²⁰ tiaq trong neo , trong rih haq ma khoe pèch pagat enh tau ka bai prìn , aih la pagat ka hanang cla Haq , ²¹ qnah hòm , bèn i mòeq ngai Pajàu kàn khoe jah dèch paqnàng broq mangai wèq hnim Boc Plinh , ²² dài bèn majah ep drah yóc kan lem jang , manoh lùì cajap cajinh , xam manoh cliac khoe jah qnhreo hreo ka trong qmèq , chac mac jah qnheo xi diac hliang , òe hu thia haten ka Chuaq . ²³ Bèn hadai ep wèq cajap ùh dalac dèh bàu bèn ma khoe anoe qnoh deh kan tangèh , majah qmang aih Mangai ma khoe tèo bàu am ka bèn aih ùh tablòq manoh . ²⁴ Mangai leq mangai meh ep hmàng ngan dabau òe hu pariaq dabau trong manoh loq waq xam trong broq yiniq lem ; ²⁵ apaq cađac biac tagop ti dabau tiah ka bài mangai ma khoe hmòt broq , mahaq ep alòng dabau , oh daq hnoq hi aih khoe haqnap dàng leq kiang oh daq ep nhet dàng aih . ²⁶ Majah qmang aih tàng bèn khoe loq ka bàu joq qnàng , yàng oe raq to broq yiniq lui , aih èh pi i ka ramènh leq òe hu baxon hlài yiniq lui hòm , ²⁷ mahaq rap gòm toq kan ramòt ta hi hadrah xam ùnh khàng dra adrènh bùh cheo mangai ma enh tablêq ka Boc Plinh . ²⁸ Mangai leq broq ùh troq ka ranenh Môise , tàng i baiq piq ngai wiang panhìn , aih èh ep jèh đac ka cachit ùh adènh , ²⁹ loq ka mangai ma jôiq padit Kon da Boc Plinh , ngan mahim tajao , aih mahim đeh ma canòm òe hu jah hadròeh , capoch halê đac ka Yiang Hadròeh ma am kan tabàih dech , oh daq ma xoh mangai aih claih ka kan hadrah baxa yi hnau qmòh ? ³⁰ Majah qmang aih bèn loq Mangai ma doe “ Kan patem òi oe ta au , bri ka au patem chau” Èh doe hòm : “ Chuaq hadrah bài mangai da haq” . ³¹ Taclich ta tì kòng Boc Plinh rih halinh aih joq ramòt qnàng ! ³² Dra hmàng hlài jò baxèm , aih atiq ka pi khoe jah kan qngah , aih hi i kan tablah nanxa kàn ; ³³ tang qnah aih chiuh kan camaih , kan baxa budàng broq kan racaih ka phù cròng ngan , i jò aih wiang chiuh kan xalep ka bài oh daq qnang hadai glàm trong qmang aih . ³⁴ Oh daq khoe ha-och ka mangai ma wì ma rùp clèh , manoh oh daq dua lem bùi jò wì ma blah yóc da pi kùng hang , majah qmang aih oh daq loq rađeh i kùng hang ma yeo lem , ùh òi ùh hnhung . ³⁵ Qmang aih apaq cađac manoh cajap cajinh da rađeh , majah qmang aih i kan baha kàn khoe palauq òe ka oh daq . ³⁶ Oh daq ep chiuh àt , òe jò khoe jah broq tiaq trong manoh Boc Plinh , aih èh oh daq hi jah waq bàu haq ma khoe tèo am . ³⁷ Majah qmang aih :

“ Oe toq biao hòm , joq toq biao hòm ,
Mangai ma padon trùh hi trùh ; Haq ùh patrò .

³⁸ Mangai taq ataq da au rih xi manoh lùì ,

Tàng loq talui , aih èh mahua yiang au joq ùh bùi ka haq” .

³⁹ Yàng da bèn kô , ùh xài mangai talui òe hu hnhung lùch mahaq mangai wèq deh manoh lùì òe mahua yiang jah dèch claih.

11.....

¹ Manòeq kô , manoh lùì aih la kan loq deh joq qnàng ta bìac bèn qnang ngèh , aih kan panhìn da bài yiniq bèn ma qnhòq hnoq . ² Canòm ka manoh lùì dài wì craq dùnh calah nèh ma khoe jah bàu manè enh . ³ xam manoh lùì , bèn loq crông tanèh khoe jah broq loh enh bàu Boc Plinh , qmang aih bài yiniq xau hnoq òiq loh enh yiniq ùh xau hnoq . Xi manoh lùì , Abên khoe dèch ka Boc Plinh mòeq ramènh tadreo yeo lem da Ca-in . Ajang aih majah creò ka haq mangai taq atòq , jò Boc Plinh capoch manè enh rai òi yòc ramènh da haq , canòm ka manoh lùì yac ka khoe cachit dua haq oe raq capoch . ⁵ Xi manoh lùì , Hênoc jah dèch atòc , ùh hiaq hnoq kan cachit ; pi i cabô oe hnoq haq taleq hòm , majah qmang aih Boc Plinh khoe òih atòc haq . Majah qmang aih adroe ka jah dèch atòc , khoe i bàu manè haq aih mangai rih lem ka manoh Boc Plinh . ⁶ ùh i manoh lùì ùh broq qmang leq majah lem ka manoh Boc Plinh ; majah qmang aih mangai thia haten ka Boc Plinh ep lùì i Boc Plinh , èh hòm haq aih mangai loq baha ka cabô ti chaq haq . ⁷ Xi manoh lùì , Nô-ê jah Boc Plinh patin ka haq loq bài yiniq qnhòq i hnoq ; haq aih mangai òiq ka manoh iu yùq , broq mòeq toq boang kàn òeq hu dèch deh hnim cla ; haq patô qnoh yiniq lui da crông tanèh , qmang aih haq jah wia mangai taq atòq trùh enh manoh lùì . ⁸ Xi manoh lùì , Apraham iu bàu Chuaq creò lam tagùng haq hujah òeq broq deh kùng hang: Haq lam mahaq ùh qnì òeh lam taleq . ⁹ Xi manoh lùì haq rih tagùng ma khoe têu am ka haq , tiah taiq ka mangai ma oe òeh ta diac wì , rih òeh roc hnim ranòh tiah ka Ysac tiah ka Jacôp , aih la bài mangai hadai jah bàu têu am tiah ka haq . ¹⁰ Majah qmang aih haq gòm mòeq toq plài i xèm cajap Boc Plinh ma khoe broq loh . ¹¹ Hadai xi manoh lùì , Sara yac ka khoe bàc hanam , mahaq dua i padren ha-uang kon , majah qmang aih haq loq Mangai ma têu bàu ka raðeh , haq aih ùh tablòq manoh . ¹² Qmang aih , enh mòeq ngai craq khoe ten cachit , jah ha-uang loh kon xau ma raya , cràm tiah ka halông ta tróc , bàc qmang ka braih diac raxiq , pi òiq rên . ¹³ Wì aih òiq cachit ta manoh lùì , qnhòq jah waq yiniq ma khoe têu am ka wì haq , toq hnoq rai prônèh òeh enh hangai , doe òeh kô tamoe hangai , mangai lam clòh ta crông tanèh . ¹⁴ Bài mangai ma anoe qmang aih , aih wì doe òeh kô qnang ti chaq òeh gùng . ¹⁵ Tàng wì hèm trùh deh gùng , aih nòe wì haq ma khoe loh enh aih , aih èh i hì wì tawih hlài . ¹⁶ mahaq wì bèn mòeq toq gùng ma yeo lem , aih gùng ma oe ta plinh ; aih iq dài Boc Plinh ma ùh camaih ka doe òeh kô Boc Plinh da wì aih , majah qmang aih Boc Plinh khoe padon òeq ka wì haq mòeq toq plài . ¹⁷ Xi manoh lùì jò Boc Plinh qnhro Apraham , haq dèch Ysac aih kon mòeq da haq broq ramènh tadreo : aih kon haq ma khoe jah enh bàu têu am . ¹⁸ kon aih raq Boc Plinh ma i doe “ Enh dalam Ysac kô èh men i mòeq nang noe wê yiniq ih” . ¹⁹ Haq hèm deh ta manoh Boc Plinh i cwiang broq ka mangai cachit rih hlài ; qmang aih i crài cleq ka haq jah hlài òeh kon enh mangai cachit . ²⁰ Xi manoh lùì , Ysac waiq xôq ramot am ka Jacôp xam Êsau ta bài yiniq padon trùh tangèa kô èh . ²¹ Xi manoh lùì Jacôp jò ten cachit , waiq xôq ramot ka baiq ngai kon da Jôsep. Khoe aih haq rai cachat òeh ajang long canhra rai kùh waiq . ²² Xam manoh lùì , jò ten cachit Jôsep haq anoe trùh bìac mangai Isorali jah loh enh Êjip rai tanap ka wì trùh bìac catùh caxènh da haq . ²³ Xi manoh lùì , jò Môise bu ha-uang , miq baq haq cadôc haq piq khê , majah qmang aih wa hnoq kon aih lem alàng , wa pi yùq qmòe ka bùa loq nòeh . ²⁴ Xi manoh lùì , Môise jò khoe radam, pi òeq wì creò ka raðeh kô kon calô da kon cadri da Phara-ôn , ²⁵ wiang nan xa pajùm ti mangai da Boc Plinh aih haq yi lènh ùh hnau ka lem bùi hyòq mòeq rahyàc ta trong yiniq lui . ²⁶ haq ngan kan chiuq xep ka Christ aih yeo khòh ùh hnau ka hang canaq da Êjip , majah qmang aih mat haq haqmiang gòm yôt òeh kan baha . ²⁷ Xi manoh lùì haq caðac gùng Êdip ùh crê ka bùa nòeh , majah qmang aih haq yòng cajap tiah gleq hnoq qmòe Mangai ma ùh xau hnoq . ²⁸ Xi manoh lùì , haq wèq ramènh Pancwa rai broq ramènh pùc mahim , òeq kiác palùng ùh hiaq jêh òac kon ramua da mangai Isorali . ²⁹ Xi manoh lùì , mangai Isorali lam pagat diac Rasiq gòh tiah ka lam ta tanèh croh , yàng mangai Êdip àu lam òiq , hì cram òng ta aih . ³⁰ Xi manoh lùì , bài panàt plài Jêricô hrùq taclih òng , atiq ka wì

khoe lam dudan ka haq tapèh hì .³¹ Xi manoh lùì , Rahap (aih mangai gucadri tech rađeh) ùh cachit pajum ti bài mangai ùh lùì , majah qmang aih haq lem manoh ðih bài mangai ma lam rinh ta aih .³² Au oe anoe cleq hòmm ? Majah qmang aih khoe pi tem tàng joq au enh anoe trùh Giđê-ôn , Barac , Jephthê , Dawit , Samu-ên xam bài pajàu qnoeq .³³ Wì aih , xi manoh lùì khoe jah blêq bài diac qnoeq , broq kan taq atoq , jah waq bài bàu têu am , bâng hacùng baco ,³⁴ plah pat pla ùnh khâng ma nga angèn , claih ka pla chang, tablêq ka yiniq , paqnoh dèh kan tanoq tanòe tajêh tablah , broq ka bài linh diac wì ep cadàu amot .³⁵ I mangai cadri khoe jah deh mangai ta hnim cachit rih hlài , i ngai chiùq kan xa-ep ðiq jaq , mahaq ùh dōq cabô paclaih rađeh , ðòeq hujah waq kan rih hlài ma yeo lem .³⁶ I ngai chiùq dōq wì do halê rađeh , chiùq blai , chiùq clang , chiùq clêh .³⁷ Chiùq dōq wì ðáp rađeh xi hmo ka cachit , pot loh baiq xi kùa , pác xam chang ; pac lac jàp jia , caxùnh ðeh bài akia trùu , akia bubi , ùh i ðeh rìm ka yiniq , chiùq wì hnen glua , baxa padit .³⁸ Crông taneh kô ùh tajì ka wì haq rih , ep pac lac tagùng hawit , tawang , takòp , roc hàm ta taneh .³⁹ ðiq dōng wì aih khoe jah bàu capoch manè ka manoh lùì da wì haq , mahaq wì haq qnhòq lòm jah waq yiniq ma khoe têu am ka rađeh .⁴⁰ Majah qmang aih Boc Plinh i palauq ðòeq bài yiniq ma yeo lem hu am ka bèn , dōq wì aih pajum ti bèn ðòeq hadai jah geo lem .

12

Ngan tiaq dua Jesus

¹ Qmang aih , pàng bèn jah bəc ngai ngan hnoq qnang oe dudan bèn tiah ka cato yùc kàn , bèn hadai ep khwênđ đōng bài kan trap xam yiniq lui ma loq tawac ka bèn , yōc manoh ùh tagah lep ðòeq cadàu tiaq trong ma khoe padon am ka bèn ,² mat bèn ngan toq dua Chuaq Jesus , aih mangai ma baxèm rai pagêh da bèn manoh lùì , pàng kan lem bùi khoe ðòeq qmòe enh ngèa cla , haq chiùq cachit talong pagat , ùh dèh ka kan camaih , manòeq kô haqngui enh qma ka gèq Boc Plinh .³ Qmang aih , oh daq ep hèm trùh Mangai ma khoe chiùq kan tablêq enh bài mangai yiniq lui , ðòeq oh daq ùh hìaq lep tagah manoh .

Boc Plinh hnài mangai da Haq

⁴ Oh daq tablêq ka yiniq lui qnhòq hìaq ep ta-ùc mahim ,⁵ oh daq ma khoe hèt đōng ka bàu ma pariaq oh daq tiah ka bàu baq ma hnài deh kon qmòh ? bàu aih rameh :

“ Kon da au , apaq jù đac bàu hnài enh Chuaq ,

Èh jò Chuaq cwò , apaq talùi manoh .

⁶ Majah qmang aih Chuaq hnài dèh mangai haq maloq waq .

Mangai leq Haq ma ði broq dèh kon aih haq blai xi long roe” .

⁷ Tàng oh daq chiùq kan hnài , aih Boc Plinh ngan oh daq tiah dèh ka kon cla , majah qmang aih i kon leq baq ma ùh lech hnài ?⁸ Mahaq tàng oh daq jah claih ka kan lech hnài mangai qnoeq ma chiùq ðeh hra , oh daq aih la kon tango , ùh xài kon joq qnàng .⁹ Baq ta taneh kô tiaq deh manoh cla lech hnài , aih ðiq bèn loq iu bàu , loq ka Baq da mahua yiang , aih ma ùh joq bèn khòh iu yùq ma yeo hnau hòmm ðòeq hujah kan rih qmòh ?¹⁰ Baq ta taneh kô , tiaq trong wì haq ma hèm dèh lem ðòeq hnài ðò bèn ùh i dùnh, yàng Boc Plinh gùt bàt bèn aih dōq jah lòeq ka bèn , ðòeq bèn hujah kan hadroèh ti haq .¹¹ Joq qnàng kan gùt bàt jò baxèm aih hnoq tiah gleq broq nen ka bèn mangò , ùh xài kan lem bùi , mahaq atiq èh caqmon loh plì taq atoq , catèm am ka bài mangai ma khoe axràmm qmang aih

¹² Qmang aih , oh daq drah dèch dèh capiang tì ma ùh nèn , hloe xam cràng ma khoe tabat .¹³ Draha palauq trong ðòeq jènh oh daq jah cadiang lam , dōq yac ka mangai cwê dua ùh hìaq lac trong mahaq jah kan broq brêh .

Apaq cađac bàu Boc Plinh pariaq hnài

¹⁴ Drah àu rih hatroq ti rìm ngai , rai chaq tiaq kan hadròeh , majah qmang aih tàng joq ùh wìh wia hadròeh ùh cabô jah hnoq Boc Plinh . ¹⁵ Ep rabiaq jaq cajoq , yùq loq i mangai capòeh ka kan tabàih dech da Boc Plinh , beq rayeq riah xang plôh loh , broq kan manhài xam kan ùh sròeh ka bàc ngai . ¹⁶ Ngan oq , taqne oh daq apaq i mangai loq tango taqnung , hadai paq i cabô loq blia racaih qmang ka Êsau , mòeq nà acaq raq mahaq chiùq tech deh cwiang kon ramua . ¹⁷ Joq oh daq loq , atiq ka aih haq enh jah bài xôq ramot aih ka rađeh , yàng khoe pì jah ; majah qmang aih yac ka haq crò hmoe creo dang , dua khoe pì jah blòq hlài manoh baq haq ma khoe dì .

¹⁸ Oh daq ùh i trùh haten ka bui wang kon mangai jah bèq , hadai ùh trùh haten ka ùnh khàng ma adrènh , hadai ùh xài thia haten kan clam cluiq , ta yùc gam , tanòe cayeò kàn . ¹⁹ tanòe ken atêh bàu dèh , tanòe bàu ma cadròt , jaq mangai leq magai meh tàng bàu aih diq cali calo ka bàu aih pì dùh capoch ka rađeh tàng hòem . ²⁰ majah qmang aih wì haq ùh nui tàng bàu kô: “ Yac ka bòe ngè rih loq tadroq , tàng thia ten ka wang kô diq ep yòc hmo đap đac ka cachit” . ²¹ Ta wang jò aih hnoq ramòt joq qnàng , jaq Môise loh qmòe ka doe “ Au crè joq qnàng , loh dồng ka tarit” .

²² Mahaq oh daq khoe trùh haten ka Wang Si-ôn , ten ka plài da Boc Plinh rih halinh , aih la Jêrusalem oe ta plinh , haten ka nòe bình plinh loe ka jàt muàn tagop ti dabau , ²³ haten ka Tagop Hadròeh da bài kon ramua ma khoe jah achih yiniq ta plinh , haten ka Boc Plinh , aih cwan hadrah da rìm ngai , haten mahua yiang da bài mangai lem taq atoq , ²⁴ ten ka Chuaq Jesus , aih Mangai taqne da tajao maneo , haten ka mahim ma khoe pùc qnoh , mahim aih lem yeo hnau ka mahim da Abên . ²⁵ Oh daq ep rabiaq haq oq ! apaq tành đac bàu Mangai ma qnang anoe ka dadeh ; tàng joq bài wì tau tablêq hlài ka bàu Mangai ma anoe bàu pariaq ta crống taneh , aih diq khoe ùh claih , loq ka bèn , tàng joq bèn rahen ka Mangai anoe bàu enh plinh , aih èh kiang ma ùh claih . ²⁶ Jò aih nèn bàu Haq aih ralàng diq ka crống taneh , yàng manòeq kô hòem haq doe “ Oe mòeq yàng hòem , ùh xài au broq ka ralàng toq ta taneh , mahaq ralàng hloe xam ta tróc” . ²⁷ Manòeq kô , bàu ma doe “ Oe tam mòeq yàng hòem” aih la rameh : bài yiniq ma loq dalàc , aih la bài yiniq ma khoe jah broq loh , aih èh ep doeh đac , đòeq toq bài yiniq ma ùh hiaq dalàc jah oe hlài . ²⁸ Qmang aih , pang jò bèn ma khoe jah waq Diac ma ùh dalàc , bèn khòh manè apôi dôi i manoh loq iu yùq hu patih ka Boc Plinh đòeq jah lem ka manoh haq . ²⁹ majah qmang aih Boc Plinh bèn aih ùnh loq ti bùh cheo .

13

Bàu pariaq pulùch

¹ Ep i manoh loq waq yôt ka dabau tành ka oh daq . ² Apaq hêt ka biac đìh tamoe , i ngai broq biac aih , mahaq ùh qnì rađeh khoe jah đìh bình plinh . ³ Ep hmàng trùh ka oh daq wì ma qnang rùp clêh , tiah cla bèn hadai qnang wiang chiùq clêh clang ti wì haq , hadai ep hmàng trùh bài mangai ma qnang oe đeh ta kan baxa , majah qmang aih chac bèn hadai tiah ka chac da wì . ⁴ Rìm ngai ep loq ta-iu trong ống mai , ta aniang ống mai ùh jah i kan ùh sròeh , majah qmang aih Boc Plinh tah hadrah ka mangai taqnung xam mangai tango . ⁵ Apaq daiq ka bac jènh , drah lem bùi ka bài yiniq đeh ma qnang i , majah qmang aih cla Boc Plinh khoe doe :

“ Au ùh talah ka kon , au ùh cađac kon” .

⁶ Aih èh bèn jah cajap manoh lùì , hu doe :

“ Chuaq wiang ti au , au ùh yùq cleq .

Kon mangai qnhòng kô broq cleq ka au jah ? ” .

⁷ Ep hmàng trùh mangai ma ajèn qnung rađeh , khoe hnài ka rađeh trong Boc Plinh , boq ngan jò pulùch qnhòng da wì haq rih , đòeq tiaq dua manoh lùì da wì haq . ⁸ Chuaq Jesus Christ hi nèn , hi kô , trùh hloe tabla èh dua ùh tablòq . ⁹ Oh daq apaq dôi bài bàu hnài lịq làn qnoeq padô rađeh ; manoh loq canòm ka kan tabàih dech đòeq jah cajap aih lem , ùh xài canòm ka dahwèq

acaq , aih bài yiniq ùh i jah taq atam cleq ka mangai broq qmang aih . Bèn i mòeq toq cabông tadreo , bài mangai patih ta hnim ranòh kùh waiq ùh khòh yóc cleq enh aih hu acaq . ¹¹ Mangai pajàu haqnheq yóc mahim da ngè tadreo wê mùt tanòe diq jaq hadròeh ðòeq broq ramènh tadreo baxon yiniq lui , yàng chac haq aih bùh enh gùng ka traiq lình . ¹² Chuaq Jesus hadai chiùq xalep enh gùng ka plài ðòeq yóc deh mahim hu broq ka mangai jah hadròeh . ¹³ Bèn ep loh enh gùng ka traiq lình , ðòeq lam trùh ta haq , ðòeq hu wiang chiùq pajùm kan camaih . ¹⁴ Majah qmang aih ta crông taneh kô , bèn ùh i ka plài ma cajap yôt mòeq ðòe , mahaq bèn chaq plài ma padon trùh kô èh . ¹⁵ Qmang aih drah canòm ka Chuaq Jesus ðòeq hu dèch yôt ramènh tadreo xam bàu manè apôi ka Boc Plình , aih la caqmon riang da hacùng bàu khoe anoe qnoh yiniq haq . ¹⁶ Paq hèt ka broq trong lem rai loq ti tabàih axong ka wì qnoeq diq , majah qmang aih , bài ramènh qmang aih lem ka manoh Boc Plình . ¹⁷ Ep loq iu bàu mangai qnung ajèn oh daq hadai ep enh qneq ka cwìang wì haq ,majah qmang aih wì haq riu ka mahua yiang oh daq , wì haq mangai ma ep anoe hlài biac da pì oh daq ka Chuaq , ðòeq wì lem bùi ðeh ka patih , ùh hiaq i cleq ep mangò , majah qmang aih trong aih ùh lòeq cleq ka oh daq . ¹⁸ Waiq khàn am ka nhèn diq , majah qmang aih nhèn loq manoh cliac nhèn kô lem enh acaq oe hnhuh jang rìm trong . ¹⁹ Au cali calo ka oh daq waiq khàn beq , dōq au rênh jah trùh ti oh daq .

²⁰ Waiq Boc Plình catèm , aih la Mangai taiq mahim tajao mòeq ðòe khoe broq ka Chuaq Jesus aih Mangai ban trùu kàn jah rìh hlài enh kan cachit , ²¹ ajang nòe Jesus Christ, Haq broq ka oh daq jah geo ta rìm trong lem , ðòeq broq gêh yiniq haq ma enh , broq loh kan lem manoh haq oe ta taqne bèn , kan ranhòm troq ka hlài diq ta haq mòeq ðòe ! Amen .

²² Manòeq kô , au pariaq pì oh daq , drah lem bùi ka tiaq bàu hnài kô ; au khoe achìh palap ka oh daq qmang aih raq . ²³ Au enh pì loq mangai oh daq bèn aih Timôthê khoe jah caqnaih , tàng haq rênh trùh , aih èh ma hi lam hmàih ka oh daq . ²⁴ Au tanap bàu hmàih trùh bài mangai broq craq tagop xam diq dōng mangai da Chuaq . Wì oh daq ma oe ta Itali hadai tanap bàu hmàih trùh pì .

²⁵ Waiq kan tabàih dech oe ti pì oh daq rìm ngai .